


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-59	Al-Hasyr	24	3	Madaniyyah	Ke-101	4



Zaman Diturunkan

Besar kemungkinan ia diturunkan pada tahun ke-4 Hijrah selepas qabilah Yahudi Banu an-Nadhir dibuang negeri.

Perkaitan Surah Al-Hasyr Dengan Surah Sebelum Dan Selepasnya

Setelah mengemukakan sifat-sifat musuh-musuh dalaman negara Islam yang mengadakan perbincangan sulit dengan maksud jahat dan berkomplot dengan orang-orang Yahudi dan lain-lain, di dalam Surah al-Hasyr ini dikemukakan cara-cara merawat penyakit nifaq. Di dalam Surah al-Mujaadalah yang lalu, pada ayat ke-14 telahpun dikatakan berkenaan orang-orang munafiq, bahawa mereka dimurkai Allah.

أَلَمْ تَر إِلَى الَّذِينَ تَوَلَّوْا قَوْمًا غَضِبَ اللَّهُ عَلَيْهِمْ

Di dalam Surah al-Hasyr ini pula didedahkan bahawa orang-orang munafiq itu tidak benar dan dusta dalam penafian mereka terlibat menyokong orang-orang Yahudi semasa perang (Ayat: 11). Di dalam Surah al-Mumtahanah akan datang, pada ayat terakhirnya orang-orang Islam diperintah dengan firman Allah.

يَا أَيُّهَا الَّذِينَ ءَامَنُوا لَا تَتَوَلَّوْا قَوْمًا غَضِبَ اللَّهُ عَلَيْهِمْ قَدْ يَئِسُوا مِنَ الْآخِرَةِ كَمَا يَئِسَ الْكُفَّارُ مِنْ أَصْحَابِ الْقُبُورِ ﴿١٣﴾

13. Wahai orang-orang yang beriman! Janganlah kamu jadikan teman rapat mana-mana kaum yang dimurkai Allah, mereka telah berputus asa daripada mendapat kebaikan akhirat, sebagaimana berputus asanya orang-orang kafir yang ada di dalam kubur.

Beberapa Kata Kunci Dan Tema Utama Surah

1. Di dalam surah ini, sebagai perbandingan dinyatakan sifat-sifat para sahabat Muhajirin dan Anshar yang ikhlas di samping kelebihan dan keutamaan mereka dengan sifat-sifat orang-orang munafiq.
2. Firman Allah وَقَدْ فَف فِي قُلُوبِهِمُ الرُّعْبُ (Ayat: 2). Ayat ini menyatakan tidak sempat berlaku pun peperangan sebenarnya dengan Bani an-Nadhir, mereka hanya dikepung dan Allah telah menimbulkan rasa gerun dan gentar di dalam hati mereka untuk menghadapi tentera Rasulullah s.a.w., hasilnya harta-harta yang ditinggalkan mereka diperolehi Rasulullah dan para sahabat sebagai harta fai'. Andainya perang berlaku, harta-harta itu tentu menjadi harta ghanimah.
3. Firman Allah: ذَلِكَ بِأَنَّهُمْ شَاقُّوْا اللَّهَ وَرَسُولَهُ (Ayat: 4) menjelaskan jenayah yang dilakukan oleh qabilah Yahudi Banu an-Nadhir iaitu mereka telah merancang untuk menghancurkan negara Islam dari dalam. Itulah sebabnya mereka dihukum supaya meninggalkan Madinah dan dibuang negeri.
4. Salah satu prinsip utama ekonomi Islam diperolehi daripada firman Allah كَيْ لَا يَكُونَ دُولُهُ بَيْنَ أَغْنِيَاءٍ مِنْكُمْ (Ayat: 7), walaupun ayat ini pada asalnya berkait dengan hukum-hukum fai' tetapi berdasarkan ma'na

umumnya ia dianggap sebagai salah satu prinsip utama ekonomi Islam, iaitu Islam tidak suka kekayaan hanya berkisar dan berputar di kalangan orang-orang kaya sahaja.

5. Kedudukan Sunnah dalam perlembagaan, undang-undang dan syari'at Islam. وَمَا آتَاكُمُ الرَّسُولُ فَخُذُوهُ وَمَا نَهَاكُمْ عَنْهُ فَانْتَهُوا (Ayat: 7). Ayat ini jika dilihat dari segi konteks asalnya ialah berkaitan dengan harta fai' yang diperolehi daripada Bani an-Nadhir. Soal pembahagiannya tidaklah harus dipertikaikan kerana pembahagian harta itu tidak seperti harta ghanimah yang diperolehi dalam peperangan Badar yang mana perinciannya telahpun diberikan di dalam Surah al-Anfaal ayat ke-41 dan jika ia dilihat dari sudut perundangan, maka ia menjelaskan tentang kedudukan hadits-hadits Rasulullah s.a.w. sama ada berupa qauli, fi'li atau taqriri. Mana-mana yang sah dari padanya boleh dijadikan landasan untuk perlembagaan, undang-undang dan syari'at Islam. Sumber utama rujukan undang-undang Islam yang berasaskan wahyu ada dua; pertama, al-Qur'an dan kedua, hadits-hadits sahih. Adapun sumber-sumber yang lain semuanya bukan sumber utama, ia hanya terbit dan terhasil dari dua asas tersebut tadi dan semuanya berasaskan ijtihad manusia yang tidak ma'shum. Perlu sekali dibezakan antara rujukan asasi dan sekunder untuk undang-undang dan syari'at Islam.

6. Firman Allah وَهُوَ الْعَزِيزُ الْحَكِيمُ (Ayat: 1 dan 24) iaitu ayat pertama dan juga terakhir mengandungi 2 sifat Allah iaitu العزيز dan الحكيم. Segala-gala yang berlaku terhadap pembuangan negeri Bani an-Nadhir, harta fai' yang diperolehi dari mereka dan lain-lainnya adalah merupakan fenomena 2 sifat Allah tersebut.